

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 2587 del 08/09/2023

Traduzione in mòcheno

Laichtn digital: va de 20 van leistagest vongen u' de online seminarn

Kònnst aninngèa' en de dai' elektronische zunthaitkartella? Boast abia as men praucht der SPID? Boast avai as noat ist za bècksln de password van dai' pc oder van dai' telefon? Kennst de online dinstn gem va de Provinz ont van Portal Trentin Òrbet? Bichtega vroggn as va òllto sai': ver za gem omport men miast digitalkompetenzn learnen as vil vert nèt dèster sai' ver a toal lait. Ver za versterchern de digitalkompetenzn van trentiner ist augòngen der projekt "Laichtn digital punkt" zolt van PNRR en projekt "Nètz van dinstn va digitalverlaichtern" van Omt ver en Digitalbècksl ont drautschauk va de Autonome Provinz va Trea't as zòmm pet Tsm-Trentino School of Management organisiaart hòt zeichen online trèffen iber a toal temen as men runt bichte sicht ver za gea' aninn en de digitaldinstn.

De trèffen kostn nicht ont sai' offet en òlla finz as de platz garift sai'. Ver za nemmen toal men miast se innschraim. Der earste trèff ist en programm ver en mitta af de 20 van leistagest, va um 17:00 finz um 18:00 ont bart klòffen iber en tema va de informatiksicherkait. De online trèffen sai' a stuck van projekt as u'pfònk ist durch en summer pet en autea' van 5 tirlar avn lònt va Cavalese, Malè, Rovereto, Tione ont Trea't, bou as de lait gea' meing ver za kriang hilf, paglaitung ont lear a'ne kostn ver en prauch van dinstn ont van digitaltechnologian.

Òndra vinf tirlar barn augat' kemmen en de bochen as kemmen ka Riva del Garda, Persn, Burg, Primiero ont San Giovanni di Fassa. En 2024 de barn 22 sai' de tirlar offet ver de lait gèltsgott en de zòmmòrbet va de Provinz ont van Consorzio van Trentinergamoa'n. S dinst ist a'ne kostn ont offet ver de lait van an iata elt ont van an iatn kennentritt. S ist ganua mèldn se durch en portal va de Provinz www.provincia.tn.it/Digitale-Facile.

Ver za schraim se inn en de online trèffen men mu aninngèa' en de sait va Trentino School of Management: <https://www.tsm.tn.it/attivita/punto-digitale-facile-seminari-online>.

S hòt an grea' nummer aa, **800228040**, as men u'riaven kònn ver za vrong hilf ont òlla de nochrictn as noat sai' ver za mèldn se en de hilftrèffen oder ver za schraim se inn en de online trèffen.

Do vinnt men bos as tsòk hòt Cristiana Pretto, iberòllviarer Umst verlaichtern ont digitalisation va de Autonome Provinz va Trea't ont Nicola Villa, vourstea'ner va de Digitalbècksl ont vernaiern Unitet Tsm:

<https://www.youtube.com/watch?v=bFc4vj0iiME&t=1s>

Ibersetz gamòcht van Sprochtirl va de Tolgamoa'schòft Hoa Valzegu' ont Bersntol

(cdt)